



# S Afi. 1.25 LO Di Pueblo

BRIYANDO FUERTE • TRECIENDO CLARIDAD  
DIAHUEBS 8 FEBRUARI 2024

**PLANTA DI PROCESA AWA  
DI BUBALI PLAS LO PASA  
AWOR PA UTILITIES CU SU  
16 EMPLEADONAN**




[WWW.SOLODIPUEBLO.COM](http://WWW.SOLODIPUEBLO.COM)



[SOLODIPUEBLO@GMAIL.COM](mailto:SOLODIPUEBLO@GMAIL.COM)

## 2 DETENCION DEN CASO DI ATRACO NA EAGLE BEACH



## PROMER MINISTER WEVER CROES A ALOCA 10.4 MIYON DEN 2024 PA DRECHA CAMINDA CU ASFALTO



Parlamentario Shailiny Tromp-Lee na Marisol Tromp:  
**BO SA MIHOR DUS STOP DI MANIPULA  
PA LOKE TA TRATA FONDO PA DRECHA  
OF MANTENE CARETERANAN**



## LOTTO TA INTRODUCI MULTI-X ARIBA BIG 4 TAMBE!



**MINISTER DI TURISMO A REUNI CU  
ATA, APA, MONUMENTEN BUREAU  
Y DOW PA E PROYECTO DI EX  
EDIFICIO DI DOW**



## Parlamentario Shailiny Tromp-Lee na Marisol Tromp:

# BO SA MIHOR DUS STOP DI MANIPULA PA LOKE TA TRATA FONDO PA DRECHA OF MANTENE CARETERANAN

Nos por a tuma nota di cuestionamento door di Fraccion di MAS pa loke ta trata suma presupuesta pa asfalta caminda. Nan a haci un serie di pregunta al respecto cual a ser contesta debidamente door di Gobierno. Cu Marisol Tromp ta haya straño e presupuesto chikito cu a reserva pa asfalta caminda den 2024 ta remarcabel. Alabes ta remarcabel e relacion cu kier trece entre e suma cu ta keda genera mediante impuesto di vehiculo y e suma cu ta keda aloca pa drecha of mantene careteranan. Ta

unlastima cu Marisol cu tur su añanan di experiencia como parlamentario y minister di Infraestructura ta cuestiona e situacion mientras e sa mihor.

Na prome lugar impuesto di vehiculo no ta un “bestemmingsheffing”, esta cu loke ta keda genera na entrada mediante e impuesto aki no ta destina especificamente pa cubri gasto di of inversion den algo specifico. Marisol Tromp sa esaki di experiencia y toch kier malinforma of uza e informacion

incorrectamente pa influencia y manipula opinion publico. Alabes ta bon pa informa pueblo kico tabata e suma cu añanan anterior a keda presupuesta pa cubri gastonan di caretera. Na 2015, tempo di bonansa y Marisol sosteniendo e Gobierno di AVP e tempo ey, e suma presupuesta tabata 3,5 miyon, na 2016: 3 miyon, na 2017: 5 miyon, na 2018: 6 miyon, 2019: 5 miyon, 2020: 5 miyon, 2021: 0, 2022: 4.2 miyon, 2023 3.5 miyon y pa 2024: 10.4 miyon.

Durante tratamiento di



presupuesto di DOW, Minister President Evelyn Wever-Croes a duna splicacion amplio di e

punto aki. Gobierno a splica un biaha mas cu door di e situacion di pandemia y nos finanzas, prioridad a keda poni riba otro aspecto cu ta bon conoci pa nos tur, manera seguridad, salubridad y bienestar general di nos hende y famianan.

Poco poco nos ta recuperando y por hisa e suma cu ta inverti den nos careteranan. Cual na ningun momento a keda sin subraya e necesidad di esaki pero mirando nos circunstancia mester a pone prioridad otro caminda.

## MINISTER ARENDS A TENE “KICK-OFF MEETING” CU DIRECTIE LUCHTVAART

Dialuna 5 februari 2024, Minister responsabel pa transporte, Sr. Ursell Arends, a tene un encuentro cu empleadonan di Directie Luchtvaart Aruba. Proposito di e encuentro aki ta pa informa empleadonan tocante e decision di Gobierno pa converti Directie Luchtvaart den un organizacion financieramente autonomo, pa duna informacion tocante e proceso cu lo wordo sigui, y pa contesta preguntanan.

Durante e “kick-off meeting” aki, Minister Arends a elabora riba e motibonan cu a yega

na e decision aki, cu a wordo tuma na 2019 caba, pero nunca a wordo implementa.

Motibo principal ta pa fortifica Directie Luchtvaart como organizacion, pa asina e por cumpli na un miho manera y na un manera mas duradero cu tur su tareanan, responsabilidadnan y tambe cu e rekisitonan di Organizacion Internacional di Aviacion Civil (ICAO) como tambe otro organisacionnan manera FAA.

E proceso di transicion lo wordo guia door di un stuurgroep nombra pa Minister, cu



entre otro representante di Ministerio di Transporte, Directie Luchtvaart, DWJZ, Directie Financien, DRH, y sindicato. E stuurgroep aki lo institui diferente werkgroep y lo tin como prome tarea pa entrega un “stappenplan” pa minister

dentro di 4 siman.

Minister Arends a enfatiza cu lo asegura un proceso transparente, unda lo duna e coleganan di Directie Luchtvaart un update cada luna.

Cu e proyecto aki lo fortifica


Directie Luchtvaart, cu ta e stakeholder principal di aviación na Aruba, responsabel pa e maneho y supervision di henter e ecosistema di aviacion na Aruba, cu ta di suma importancia pa nos turismo y nos economia.

# Minister Dangui Oduber **MINISTER DI TURISMO A REUNI CU ATA, APA, MONUMENTEN BUREAU Y DOW PA E PROYECTO DI EX EDIFICIO DI DOW**



Dialuna mainta Minister di Turismo y Salud Publico sr. Dangui Oduber conhuntamente cu Director di Aruba Ports Authority (APA) sr. Marc Figaroa, CEO di Aruba Tourism Authority (ATA) sra. Ronella Croes y tambe e representante di DOW y Monumenten Bureau Aruba, sr. Raul Gei, a bini hunto pa un “kick off meeting” pa e proyecto di ex-DOW cu lo inicia pronto. E proyecto pa e edificio di ex-DOW ta un proyecto di renovacion. E edificio aki cu ya caba tin 16 aña bandona, ta un bista menos agradabel pa nos bishitantenan cu ta baha for di crucero. Pronto, Aruba lo mira desaroyonan di e proyecto di Port City y esaki tin como plan tambe cu e oficianan existente di APA (tegenover di Yrausquin & Sons) lo mester muda bay

den e edificio renoba di ex-DOW. Como esaki ta un edificio basta grandi ta bay comparti e edificio di manera cu e piso 2 ta bira oficianan di APA. Aruba Tourism Authority (ATA) ta bay huur piso 1 di e edificio y lo bay converti e piso aki den un Visitor Information Center (VIC) pa brinda informacion na nos bishitantenan. E VIC lo brinda tur informacion di kiko tur tin di haci na Aruba, kiko ta tur e actividadnan, nos miho beachnan, lista di restaurantnan y kiko tur nos tin pa ofrece, nightlife, transporte y mucho mas. E lo sirbi como un guia pa e turista asina cu e baha di e barco crucero. Minister Dangui Oduber su vision y maneho den turismo ta basa riba keda haci inversionnan continuo den producto Aruba. Aruba ta un bon producto y di calidad.




Pero pa mantene nos mes competitivo e ta di vital importancia pa keda haci inversionan continuo den nos producto y esey ta local cu ta wordo haci tambe cu e proyecto aki.

• Ministerio di Turismo y Salud Publico •

Minister Oduber a demostra di tin un vision cla di proyectonan cu lo beneficia nos turismo y nos pais Aruba y renobando e ex-edificio di DOW lo tin un potencial grandi pa nos turismo

crucero. Finalmente un danki na APA, ATA, DOW y Monumenten Bureau Aruba pa hunto realiza un proyecto cu lo ta un hoyo den e centro di Oranjestad cu nos tur por ta orguyoso di dje.

# MINISTER ENDY CROES A PRESENCIA E DI 45 JUMP UP ESCOLAR DEN E BARIO DI SANTA CRUZ



Publico presente por a disfruta di e jump up yena cu creatividad y hopi ambiente. Minister Endy Croes ta felicita Colegio Laura Wernet – Paskel cu nan 45 Jump Up Escolar. Tambe, mandatario di Enseñansa y Deporte ta manda palabra di pabien na tur alumno, maestro y mayor di e scolnan cu a participa den e exitoso jump up. Por ultimo, Minister Endy Croes ta gradici e scolnan, comision organisado, boluntario y tur esnan cu a contribui pa haci e parada aki posibel.



Diabierna atardi, Minister Endy Croes a presencia e di 45 Jump Up Escolar organisa pa Colegio Laura Wernet-Paskel. E jump up a sali for di parkeerplaats di Colegio Laura Wernet-Paskel, pasa den e cayanan di Santa Cruz y finalisa na veld di Sportboys. Un total

di seis (6) scol a participa na e parada aki esta, Curason Contento Peuterschool, Sint Jan Kleuterschool, Colegio Laura – Wernet Paskel, De Schakel, Cacique Macuarima y Colegio San Hose. Tabata reina un bon ambiente y e alumnonan tabata gosa.

Danki pa engrandece Aruba su Carnaval 70.

Minister Endy Croes ta desea Aruba un dushi temporada di Carnaval 70. Ban celebr'e onscientemente!



# PLANTA DI PROCESA AWA DI BUBALI PLAS LO PASA AWOR PA UTILITIES CU SU 16 EMPLEADONAN

Diaranson mainta den reunion di parlamento, Gobierno di Aruba por medio di minister di infraestructura, Sra. Wever Croes a bisa cu e planta di procesa awa preto, esta conoci como Bubali Plas lo pasa for di DOW y lo bay cay bao di Utilities NV.

E traspaso aki tin di haci cu varios factornan pa asina por independisa e planta aki y pa asina por logra e inversionnan necesario pa drecha e situacion.

E traspaso ta trata tambe di 16 persona di cual mayoria lo bay over bao di Utilities y algun ( 3x)

a dicidi di kier keda Gobierno.

Cu e planta aki bao maneho di Utilities, e portanan ta habri pa asina por bay drecha, inverti y asina mehora e proceso di awa preto.

Cerando e temporada di mucha y hoben pa Carnaval 70

# MINISTER DI CULTURA TABATA PRESENTE NA KIMAMENTO DI MOMITO



Diadomingo cu a pasa, den Carnival Village na San Nicolaas, a tuma luga e kimamento di Momito di Carnaval 70. Esaki ta un tradicion cu ta marca e fin di e temporada di Carnaval pa nos muchanan y hobennan.

Minister Maduro encarga cu Cultura tabata presente pa asina compana SMAC y e monarcanan Infantil y Hubenil pa bisa ayo na Carnaval 70, despues di un temporada exitoso tras di lomba. Durante e anochi aki, SMAC a otorga un reconocimiento bon merci na Janine Rodriguez di Slachtofferhulp pa e bunita trabou cu e ta eherciendo pa nos Pais. Despues di esaki, a sigui pa scucha e testament di Momito lesa pa e Prins y Panchonan, caminda cu varios punto a resalta, entre otro cu Momito ta haya cu e parada di mucha tabata uno luhoso, yena cu hopi fantasia pero tambe den mesun rosea a indica di tabata tristo di mira hopi

mucha chikito laat riba caya y hopi tambe sin usa earplugs. E mandatario ta pidi pueblo di Aruba pa ta mas consciente y pa hunto nos ban proteha nos muchanan cu ta e futuro di mayan. Finalmente, despues di a lesa e testament a bay over pa kima e Momito cu a marca fin di e temporada aki pa nos muchanan.

'Cultura bo tin cu bib'e y bo participacion ta engrandec'e' tabata palabra di e mandatario na final di e evento aki. Minister Maduro, den nomber di Gobierno di Aruba, ta gradici SMAC, tur grupo di carnaval y specialmente nos muchanan pa un Parada di Mucha sumamente bunita y exitoso.



# LOTTO TA INTRODUCI MULTI-X Ariba BIG 4 TAMBE!



Diahuebs 8 di februari 2024, Lotto, E Loteria di Aruba, ta contento di por anuncia cu desde diabierna 9 di februari e tan gusta Multi-X tambe ta obtenibel cu e wegá di Big 4! Multi-X ta duna bo e oportunidad pa multiplica bo premio te cu cinco biaha!

Abo ta cla pa multiplica bo premio

awo tambe cu Big 4? Big 4 ta un wegá di 4 cifra for di 0 – 9, cu sorteo di merdia y anochi, pues ta invita pueblo di Aruba pa pasa cumpra nan ticket pa e sorteo di diabierna merdia of anochi. Bet ta cuminsa desde 0.50 te cu 35 florin (35 pida) y e prome premio di Big 4 ta 5.000 florin. Multi-X ta duna bo e oportunidad di gana bo premio di Big 4 mas un extra chens, multiplica bo premio di Big 4 te cu dobel, tripel of cinco biaha mas.

‘Multi-X’ a wordo introduci cu e wegá di Lucky 3 cu ta un wegá di 3 cifra, despues cu Multi-X a haya un gran aceptacion, a introduci’e ariba e wegá di Catochi y awo ta introduci Multi-X ariba Big 4 tambe, dunando bo e chens pa multiplica bo premio! Con pa hunga?

Bo ta cuminsa na cumpra bo Big 4

cerca bo rebendado di Lotto preferi of bishita Lotto Online. Bo ta scohe bo 4 cifranan for di 0 – 9 mas bo suma di bet, y pidi bo rebendado pa agrega e Multi-X na bo compra di Big 4, cual lo bira e mesun suma cu bo a bet pa Big 4. Si bo a cumpra 1 florin na Big 4 y bo a agrega Multi-X, automaticamente Multi-X lo costa 1 florin tambe y bo ticket lo costa total di 2 florin.

Durante sorteo di Multi-X si e bala FP sali, bo ta gana e premio di Big 4 y bo ta haya un chens extra pa e siguiente sorteo di e mesun orario. Si bo gana e prome premio y si sali e bala X2, bo ta gana dobel di e prome premio di Big 4 cu lo bira 10.000 florin (5.000 x2), si sali un bala X3 e prome premio ta bira tripel cu lo bira 15.000 florin (5.000 x3), anto si sali X5 e ta bira cinco biaha mas y bo a gana 25.000 florin como

prome premio (5.000 x5). Y asina ta conta pa ora bo hunga 3 cifra tambe di Big 4.

Busca bo Big 4 y multiplica bo premio cu Multi-X, multiplicando bo suerte den 2024! Sintona na e sorteo cu ta pasa tur dia 2:30pm y 7.45pm, y diadomingo 2:00pm.

Lotto, E Loteria di Aruba tin diferente wegá, Catochi, Big 4, 1-OFF, Zodiac, Wegá di Number di Korsou di Lotto, Lucky 3, Multi-X, Lotto di Dia, Lotto 5, Mini Mega cu su Mega Plus y e diferente wegánan di Raspa y Gana y Instacash. Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.

## Minister Glenbert Croes:

# MINISTERIO DI INTEGRACION HUNTO CU ASOCIACION DI CUERPO CONSULAR DI ARUBA LO CREA UN PLATAFORMA DI GUIA Y ASISTENCIA PA E CIUDADANONAN STRANHERO

**"Aruba ta un solo pueblo, y Ministerio di Integracion cu ACCA lo traha hunto pa Aruba"**

- Diamars mainta, Minister di Integracion Glenbert Croes hunto cu su conseheronan huridico tabata presente na un presentacion di e Asociacion di Cuerpo Consular na Aruba. E presentacion aki, presenta pa sra Solangel, a wordo yama, e proyecto aliansa, y a enfoca riba e posibilidad, pa tur e consuladonan na Aruba y esnan den Caribe Hulandes, traha hunto cu Ministerio di Integracion, pa crea un plataforma di conseho, guia, asistencia, y apoyo na e henter e comunidad stranhero cu ta biba na Aruba.

Un di e preocupacionnan cu a wordo treci dilanti, ta e echo cu tin hopi ciudadano stranhero na Aruba cu ta wordo mal conseha, of ta wordo kita placa pa asina por tramita

nan documentonan pa permiso. Pa evita e casonan aki den futuro, kier bin cu un plataforma, na unda ministerio di integracion hunto cu e consuladonan lo traha hunto pa asina conseha, guia, y duna asistencia na e ciudadanonan stranhero aki, pa na un manera legal y sin problema por yega na nan permiso. A traves di e trayecto di integracion responsabel cu tin, y e necesidad riba mercado laboral pa trahadonan, lo duna preferencia na tur local prome y na tur ciudadano stranhero cu a drenta Aruba legalmente.

Mirando tur e proyectonan, pa loke ta e zona di refinaria, cu lo bay bin, lo bay tin e necesidad di trahadonan responsabel y di bon boluntad. E ciudadanonan stranhero cu a yega Aruba di un manera responsabel



y legal, y cu tin respet pa e pida baranca aki, ta loke e mercado laboral mester, y pa e motibo aki, Aruba ta dispuesto pa brinda nan e oportunidad pa labora akinan, y asina forma hunto cu nan famia, un miho bida na Aruba.

"Mi ta gradici e consuladonan pa nan iniciativa pa bin cu e plataforma di aliansa aki, paso ta solamente trahando hunto y uni, nos por sigura un servicio humano y husto

pa e comunidad stranhero, cu tin e deseo di bin forma un hogar aki na Aruba. Aruba ta nos tur, Aruba ta un solo pueblo. Manera nos libertador Betico Croes a bisa, "Arubiano no ta solamente esun cu a nace na Aruba, sino tur esnan cu a bin pa aporta na progreso y bienestar di nos isla". Aruba ta un solo pueblo y Ministerio di Integracion cu ACCA lo traha hunto pa Aruba" Minister Croes a expresa.

# PROMER MINISTER WEVER CROES A ALOCA 10.4 MIYON DEN 2024 PA DRECHA CAMINDA CU ASFALTO



Diaranson mainta, Promer Minister di Aruba a informa cu DOW lo dispone di un suma di 10.4 miyon pa 2024 pa asina por drecha, renoba of traha caminda na Aruba.

"Engeneral e aña aki a aloca 10.4 miyon florin pa caretera", Promer minister a bisa. Tambe tin 3 miyon pa

mantencion di edificionan cu añanan anterior no por a tuma lugar. Comparando cu aña anterior, por bisa cu tabata aloca 3.5 miyon aña prime 4.2 miyon y na 2021 tabata tin cero placa aloca debi na pandemia. Den comparacion awor tin 10.4 miyon pa drecha caminda.

Ultimo tampon debi na hopi awacero por

constata cu camindanan ta deteriora hopi liher. Cu e injeccion aki di 10.4 miyon florin, pueblo di Aruba lo bira testigo di un avansa grandi riba camindanan nobo.

Solo di Pueblo ta pone

enfasis riba caminda di Franse Pas, cu ta sumamente importante, pero tambe caminda di Tanki Leendert pa Tanki Flip, como tambe varios otro camindanan cu ta hopi trafica, pero cu hopi lapi. Camindanan di tera

tambe no por keda atras, unda sigur un cantidad di camindanan di tera lo por wordo asfalta. Mester tene cuenta si cu es renobacion aki lo bay yega poco poco na tur skina di Aruba, den siguiente añanan nos dilanti.

**Lunch menu**  
565-3232

- >OXTAIL
- >Carne Mechada
- >Bacalao
- >Curry chicken
- >Mochi pisca
- >Porkchop stoba
- >Chicken mushroom
- > Sopi galiña

**MINIBOX**  
Curry chicken

**COMPOSITE VENEERS**  
THE PERFECT WAY TO ENHANCE YOUR CARNIVAL LOOK

**JULY GARCIA**  
OWNER

FREE CONSULTATION  
+297 585 3255  
+297 592 9398

DENTAL SOLUTIONS ARUBA  
DENTAL SOLUTIONS ARUBA

# Prome Minister Evelyn Wever-Croes: TRABOUNAN DI RESTRUCTURACION DI APARATO GUBERNAMENTAL TA BAYENDO BON

Dialuna ultimo, Prome Minister Evelyn Wever-Croes a reuni cu representantenan di Departamento di Recurso Humano y a haya un presentacion di e prome conclusionnan di e estudio riba restructuracion di aparato gubernamental. Esaki ta un estudio cu lo tuma su tempo, y lo tin resultadonan importante pa Aruba.

Gabinete Wever-Croes desde inicio di gobernacion, ta tumando pasonan pa haci e aparato gubernamental mas eficiente pa mehora mas ainda e servicio na ciudadanonan. Den e cuadro aki, tin dos proyecto grandi andando, restructuracion di e aparato gubernamental y e proyecto di e-Government. Prome Minister a indica cu e trabounan

di restructuracion di e aparato gubernamental, den cuadro di e plannan di reforma, Landspakket, a palabra cu Hulanda cu nan lo duna asistencia den esaki y Hulanda a ‘engaged’ PriceWaterHouse Coopers pa haci estudio con por optimalisa e aparato gubernamental. Trabounan ya a cuminsa y a reuni cu tur departamento di Gobierno. E prome resultado a keda cla y dialuna ultimo Prome Minister a haya un presentacion pa Departamento di Recurso Humano di e resultado preliminar di estudio aki.

Prome Minister a remarca cu den e estudio a tene cuenta cu diferente tarea. Cua ta e tareanan cu segun ley e departamentonan mester haci y cua tareanan e departamentonan ta haci cu no ta cay segun ley.

Tambe a pone atencion na e tareanan cu lo por wordo privatisa y cua ta e tareanan cu mester stop. Tambe den e estudio a conclui cua ta e tareanan cu mester wordo haci y no ta wordo haci y con pa structura esakinan miho posibel.

E departamentonan cu ta resorta bou di Ministerio di Asuntonan General y Infraestructura a pasa den e proceso aki y DRH hunto cu Prome Minister a repasa e conclusionnan di e estudio. A base di e conclusionnan aki, lo sigui cu e siguiente fase den cual lo bin cu proposicionnan concreto kico ta e tareanan cu lo por privatisa entre otro, pa asina restructura e aparato gubernamental y haci’e mas eficiente.

“Na final di dia, e aparatona gubernamental mester ta mas eficiente, cu suficiente



empleado cualifica y cu tur herment y ekipo pa duna e miho servicio posibel na ciudadanonan di Aruba.


Esey ta nos compromiso y nos lo percura pa cumpli cu n’e”, Prome Minister a duna di conoce.

## 2 DETENCION DEN CASO DI EAGLE BEACH

Diaranson den oranan di madruga e Atraco Team (TBP) hunto cu team di Aresto a haci un entrada hudicial na Amandelstraat.

Esaki ta relaciona cu e caso di atraco riba un dama cu tabata canando banda di Eagle Beach y na unda dado momento e lo wordo atraca y hinca.

Den e accion di awe madruga tambe tabata presente K-9 Unit y Flex Team. A detene dos sospechoso den e caso aki. E sospechosonan nan ta di inicial S.C.T. naci na Aruba y M.F.L.S. naci na Colombia. No ta descarta cu lo por tin mas detencion den e dianan nos dilanti.





# ARUBA TOURISM AUTHORITY A ESTRENA PROYECTO ESPECTACULAR DI STEELPAN DURANTE CARNAVAL 2024

‘A ricibi gran aceptacion di e comunidad carnavalesco durante e prome salida’



Diasabra ultimo durante Grand Lighting Parade Oranjestad, Aruba Tourism Authority a desvela local ta bira e proyecto di ‘Aruba ta presenta The Invaders and Steelpan History’. Un proyecto di un gran magnitud y bunitesa cu lo ser admira durante Parada di Luz San Nicolaas, sigui pa Parada Grandi di San Nicolaas, y Parada Grandi di Oranjestad.

E iniciativa remarcabel aki a conta cu participacion legendario di Aruba Invaders, e banda di steelpan di mas bieu y stima na Aruba. Cu un historia rico di mas cu 70 aña, Aruba Invaders a sa di domina e arte di musica y a dedica nan mes pa pasa nan conocimiento musical y herencia cultural di musica di steelpan na diferente generacion.

E presentacion di e trailer di A.T.A. hunto cu Aruba Invaders tabata e punto di atencion riba e anochi magestral aki. Por a presencia mensahe general di A.T.A., un presentacion di videonan di carnaval di antes te cu awor, y tononan musical di steelpan mas

emblematico di Aruba. E bunita colaboracion aki tabata un celebracion y un regalo na e comunidad di Aruba dedica na e legado cultural di Aruba su carnaval.

Alabes, A.T.A. a pone disponibel un Qr-Code riba e trailer cu ta brinda detayenan tocante e proyecto den su totalidad, historia, diferente video y musica di pasado te awor. Nos ta invita e comunidad pa scan esaki durante di parada of bishita <https://www.aruba.com/us/our-island/history-and-culture/steelpan-history>.

Un invitacion ta ser extendi na e comunidad local y bishitante di e isla pa un nan mes na e proyecto historico aki. Disfruta di e ritmo contagioso, captura momentonan inolvidabel, y bira parti di e legado carnavalesco cu lo keda resona den e cayanan vibrante di Aruba.

Un danki special na Go Cultura Foundation y Elite Productions, y na e siguiente organisacionan pa cu nan contribucion y conocimiento: Departamento Arubiana-Caribiana di Biblioteca Nacional di Aruba, Sra. Graciela Nedd-Cheng, Archivo Nacional di Aruba, Sra. Maybelline Arends-Croes, Rebecca Roos Productions, canal di YouTube: Roos Productions.

Tocante Aruba Tourism Authority (A.T.A.)

Desde 1 di januari 2011,



Aruba Tourism Authority ta opera como un ‘Sui Generis’. Un organizacion independiente den e esfera publico. Aruba Tourism Authority ta fungi como ‘Destination Marketing and Management Organization (DMMO)’ y ta responsabel pa uni interes turistico entre socionan local y internacional, cu e proposito di coordina cu diferente di e socionan aki, mercadeo pa e destinacion, y desaroyo di e destinacion. Tocante Aruba Invaders

Durante decada ‘40, bou guia di maestro Trinitario Leonard Turner, “The Invaders” a inicia un revolucion musical na Aruba, trahando melodia cu drum di Refineria di Lago. Na 1948, The Invaders a bira e prome orkesta di steel profesional di e isla. Pa despues Vincent Bacchus uni na 1951 cu formacion di “The All Stars Steel Band.” Cu tempo, a surgi mas maestro manera Paul Connor

cu ‘Caribbean Stars’ y Dennis Jones cu su mesun banda unico. Na 1952, Edgar Connor, e tocado di steelpan di mas hoben, a forma su banda y asina a stimula y profila bandanan di steelband cu ritmo y estilonan caracteristico. Awendia, Aruba Panman Foundation, encabeza pa Sr. Lee Connor di Aruba Invaders, ta preserva e legado pa continuacion di e tradicion hunto cu demas rumanan Connor.

Miembro Independiente di Parlamento Rycond do Nascimento

# MEP ta cobarde pa combati corrupcion



Parlamentario independiente Do Nascimento a tuma nota di e ponencia di señor Ricky Hoek, cu partido

MEP no ta corrupto, pasobra MEP ta trahando proactivo pa caba cu corrupcion. E prueba, segun Hoek, ta

cu MEP a bin cu tres ley di integridad. Do Nascimento su prome observacion ta cu casonan Tulipan, Kwihí y Anglo ta indica corrupcion na e nivel di mas halto den MEP. Su di dos observacion ta cu MEP ta

coautor di corrupcion crioyo y na di tres luga, ley nan no ta nifica nada, si hende no ta tene nan mes na ley.

Segun Do Nascimento señor Hoek mester defende MEP, pasobra señora Evelyn Wever-Croes a faya cu transparencia den e caso di Besaril. Señora Evelyn a detecta irregularidadnan laat, el a tarda pa investiga y el a nenga di comparti e rapport di CAD cu Parlamento. Esey no ta cuadra cu integridad.

E parlamentario independiente ta admiti alabes cu hopi critica contra MEP ta hanca den un perspectiva

di corto plaso y ta demostra un speransa pa goberna cu AVP. Do Nascimento ta haya cu responsabilidad

pa futuro ta rekeri un panorama amplio. Mester reconoce cu señora Evelyn mes a (1) pone CAD investiga Besaril, (2) a bay Ministerio Publico, y (3) a duna splicacion amplio den Parlamento encuanto e

rapport. Esaki ta señalnan cu gobierno no a lubida transparencia ni responsabilidad por completo.

Segun Do Nascimento señora Evelyn ta un santo compara cu señor Mike Eman. Den añanan 2009-2017

nunca Eman a worry cu advertencianan y tampoco el a laga CAD investiga ex-ministernan Croes, Sevinger, Oduber, Visser, Dowers of Hooijboer-Winklaar. Patronahe politico a conoce añanan di bonansa, mientras AVP solamente tabatin interes pa investiga corrupcion cerca MEP. Tur hende por corda e caso di Eddie Briesen y di Endy Croes. Ora bo ta proteha friends, mientras bo ta persigui contrincante, bo ta altamente

corupto.

Toch MEP no ta combati corrupcion den un forma efectivo. Do Nascimento ta splica cu MEP mas bien a

stroba eliminacion di corrupcion crioyo. Na prome luga señora Evelyn a crea un sentimiento falso cu e

slogan “integridad, nace bo ta nace cu ne”. Esey a duna Mepistanan un arrogancia cu automaticamente

nan ta integro, mientras tur Avpista ta corrupto. Asina Mepistanan a haya briyo cu a conduci na casonan

Tulipan, Kwihí y Anglo. Ademas di esey, señora Evelyn a bay bagatelisa e problema, papiando di apel

putri y solucionnan facilto: BIA lo siña ambtenaar basha abao riba otro y cada ken mester sinta riba su

blaar. Si señora Evelyn ta honesto y sincero den su deseo pa combati corrupcion, e prome cos cu e mester haci ta reconoce publicamente

cu desde 1986 AVP y MEP a institucionalisa corrupcion. Patronahe politico a penetra den tur skina di gobernacion, dunando hopi beneficio na AVP y MEP. Pa eradica corrupcion,

mester bin un transformacion den nos cultura politico. Esey no ta facil. Esaki ta hiba na e di dos cos cu señora Evelyn mester haci pa combati corrupcion efectivamente. Mester splica pueblo cu Hulanda ta nos

partner contra corrupcion, en bes di busca pleito publico cu staatssecretaris Van Huffelen. Señora Evelyn

mester proyecta determinacion pa traha hunto cu Hulanda pa realisa un administracion financiero

solido, pasobra bon gobernacion financiero ta enemigo di corrupcion. Tanten señora Evelyn keda bringa

RAft, e mes ta preparando e cama pa e yiunan politico di señor Mike. Mester duna maximo colaboracion

na Landspakket, pasobra Landspakket lo introduci proceduranan strak cu por elimina faboritismo

politico y pone fin na e comercio cu ontheffing, cu permiso, cu opcion di tereno comercial y cu contractnan gubernamental. Ta Landspakket por para nombramento politi-

co den Setar, RDA, WEB, Elmar y Utilities. Por ultimo Hulanda ta nos aliado den control penal y handhaving. Djis scucha con Paul,

Benny y Otmar ta fomenta rabia contra Hulanda, pareu cu rabia contra polis, Landsrecherche, Ministerio

Publico y Hues.

P'esey parlamentario Do Nascimento ta yega na e conclusion cu MEP ainda no a demostra suficiente

curashi pa combati corrupcion na nivel nacional ni den su mesun seno. Si nos kier un miho futuro pa nos yiunan, nos mester bira hopi mas efectivo den lucha contra mal gobernacion y p'esey nos mester traha

hunto cu Hulanda pa eleva gobernacion na Aruba. Tanten MEP no ta deal cu corrupcion head on, mester conclui cu MEP ta cobarde.

# Un suplica pa resumi buelo directo entre Aruba y Venezuela

Skirbi pa Clyde R. Harms

Gobierno di Aruba a caba di anuncia cu nan ta extendende e ceramento di frontera cu Venezuela pa tres luna. Hopi hende ta puntra: PAKICO?!?!? Un di e razonnan cu gobierno a duna aña pasa dia cu el a cera frontera entre Venezuela y Aruba tabata e miedo cu una bes cu un Venezolano pone pia riba Aruba e por pidi asilo y pa acuerdonan internacional Aruba nos ta obliga di acepta como un refugiado. E decision di Gobierno di Aruba tabata corecto E TEMPO EY. E tempo ey Venezolanonan no tabatin mester di viza pa drenta Aruba y

hopi Venezolano lo a haci uzo di e oportunidad pa pidi asilo na Aruba pagando solamente un pasashi di Punto Fijo pa Aruba. Ta hopi Venezolano a perde nan bida tratando di bin Aruba cu e botonan cu a naufraga na costa di nos isla despues di a paga un cantidad di placa na e "coyotenan marino". Si nan por a bin cu avion tur lo a bin bulando. E situacion no ta mescos mas. Awor ta existi un moda di controla e fluho di Venezolano pa Aruba. Desde prome di januari 2021 tur Venezolano mester tin un viza otorga pa consulado di

Hulanda. E consul por determina kico ta e intencion di e Venezolano cu a pidi viza y asina evita un tsunami di Venezolano cu lo por bin busca asilo. Un otro opcion di e Venezolano ta pa busca un viza pa drenta Merca pasobra nos maneho di entrada mara cu acuerdonan cu paisnan di EU ta honra viza pa bay Merca. Pero, puntra bo mes, ta cuanto Venezolano cu un viza pa drenta Merca lo bin pidi asilo na Aruba? Adán Celis, e president di FEDECAMARAS VENEZUELA recientemente a declara na un periodista di Aruba: ...prohibición de vuelos por parte de Aru-

ba perjudica el comercio. Economistanan ta calcula cu Aruba su economia a perde como \$150 miyon di entrada di turismo pa aña, algo di \$450 miyon desde cu a cera e frontera aereo. Nos pueblo Arubiano por a evita un parti grandi di e aumentonan di impuesto den e periodo ey. En cambio, na Corsow nan ta masha content cu nan experecia desde cu e frontera di nan cu

Venezuela a habri atrobe. Frontera habri ta hopi bon pa nan economia, y no tabatin consecuencia negativo! Pakico Aruba no a haci mescos? En bes di extendende e ceramento, pakico no a haci manera Corsow y habri e frontera pa yuda economia di pais Aruba y su pueblo. Mi ta suplica nos gobierno pa reconsidera nan decision.

## SOPÍ DI LETRANAN

Z	B	D	R	L	I	O	N	T	V	H
C	E	C	U	A	C	A	T	E	B	O
D	H	B	R	C	B	E	O	N	U	R
O	G	I	R	O	K	B	I	Q	T	S
G	I	P	C	A	C	H	I	W	T	E
C	R	P	N	K	P	O	E	T	E	S
O	A	S	I	L	E	E	D	R	R	P
W	F	V	O	G	B	N	R	I	F	I
U	F	D	D	O	N	K	E	Y	L	D
S	E	W	H	A	L	E	F	L	Y	E
E	L	E	P	H	A	N	T	D	F	R

DOG  
CAT  
BEE  
COW  
HORSE  
DONKEY  
CHICKEN  
PIG

RABBIT  
DUCK  
WHALE  
DOLPHIN  
SPIDER  
BUTTERFLY  
SNAKE  
GIRAFFE

ELEPHANT  
CROCODILE  
LION  
ZEBRA  
FLY



**PRONOSTICO DI TEMPO**

TEMPO VALIDO TE DIAHUEBS 08 DI FEBRUARI 2024, 18:00 ORA

**AVISO/ ALERTA:**

DURANTE PROXIMO DIA OF DOS E DIRECCION DI OLANAN LO TA FOR DI NOORDWEST Y ESAKI POR HASI LAMA POCO BRUTO NA COSTANAN SITUANA PARTI ZUID. TA PIDI LANDADONAN Y USUARIONAN DI LAMA EN GENERAL PA TENE CUENTA CU ESAKI.

POTENCIAL DI AWACERO PA PROXIMO 24 ORA:

1 TE 5 MM; LOCALMENTE ESAKI POR TA DIFERENTE.

REGISTRACION DI TEMPERATURA (GRADO CELSIUS) Y AWACERO (MM) DEN ULTIMO 24 ORA (8'AM PA 8'AM):

PRONOSTICO DI TEMPO PA PROXIMO 3 DIANAN: PARCIALMENTE NUBLA CU UN POSIBLE AWACERO PASAJERO.

BIENTO LO TA FOR DI DIRECCION NOORDOOST TE OOST

Y MODERA TE BASTA FUERTE DEN RAFAGA. TEMPERATURA (GRADO CELSIUS)

MAX / MIN LO TA: 31 / 26

# AVP A EFECTUA OTRO EXITOSO EHEMPEL DI COMMON GOOD



mira caranan nobo den partido AVP y su halanan di conseho tambe hopi activo cu e lider di partido den e accion aki, manera Wendrick Cicilia, Giovanni Christiaans, Clifford Heyliger, Dennerich Kelly y Frits de Palm. Locual sin duda a resalta ta e acohida grandi cu Mike Eman y su esposa Doina hunto cu e delegacion tabata tin den e pueblo riba e ruta di Lighting Parade. Por a mira con continuamente Mike Eman tabata worde brasa cu hopi spontanidad y saluda cu hopi calor. E voluntarionan berde a yega den un bus yen na haltura di Banco di Caribe cu vest berde cu e inscripcion "Think Common Good", e tema di bon comun cu e partido berde ta enfocando masha hopi mes. For di eynan a cana cu e lider di partido Mike Eman henter e ruta di Vondelaan y L. G. Smith Boulevard repartiendo saconan pa tene Aruba



A reparti saco pa tene Aruba limpi riba henter e ruta di Lighting Parade! Cu un grupo grandi di voluntarionan lider di parti-

do Mike Eman y su esposa Doina a reparti saconan pa tene Aruba limpi riba e ruta di Lighting Parade. Por a

limpi y na e mes momento saludando e pueblo y recibiendo brasanan di simpatia y apoyo. Voluntarionan a worde acompaña cu pick-up nan cu muscica,

refresco y e saconan y asina den un forma hopi planea, organisa y estructura a cumpli cu un proposito bunita pa comunidad, den espiritu di e BON COMUN.

# Reina, Princesita, Prins y Pancho di Filomena College Mavo 2024

Recientemente Filomena College Mavo na San Nicolas a eligi su representantenan di Carnaval 70.

Publico por a vota online pa saca esunnan cu lo representa e scol den e paradanan escolar di Carnaval 70.

Entre otro cada participante por a traha un video cu su mensahe p'e hubentud di San Nicolas y Aruba henter pa Carnaval 2024.

MC tawata mener Addonsito y e resultado tawata: Princesita: Manon Kraaikamp (klas 1A).

Reina: Anwizienne Geerman (klas 2C)

Prins "DEN" y Pancho "Ambiente" tawata Keondre Harrigan y Jaydrick Panneflek.

For di directorado di Filomena College Mavo, cada un a ricibi un regalo y tur mucha presente a scucha cu e scol lo ta activo participando cu nan representantenan den Carnaval 71 den 2025.



## SUDOKU

	7			6				9
6			5				8	
		4				7		
	3				6			
2				5				8
			4				1	
		3				4		
	2				7			3
1				8			2	

3			4				1	
							7	
	8		6					4
2			3	9		6		
4			5					
1		7					9	
						8		
	4							6
		6	8	1			5	7



# FORTALEZA PA FAMIA

## Scirbi pa Pastor Marcel Balootje.

# HENDE ORGUYOSO Y MALVADO NO TIN ENTRADA SERCA DIOS

Hesus Cristo a bisa, y ta para scirbi den Marco 9:43-48: Si bo man haci ta bo tropica, corte kita afo, miho bo drenta bida mancaron, cu teniendo dos mannan bo bay den fierno, den e candela cu no ta paga nunca, caminda nan bichi no ta muri, y e candela no ta paga. Si bo pia ta haci bo trom-

pica , corte kita afo, miho bo drenta bida lam,cu teniendo bo dos pianan bo wordo tira den fierno,den e candela cua no ta paga nunca, caminda nan bichi no ta muri, y e candela no ta paga. Si bo wowo haci ta bo tropica , sake tira afo, miho bo drenta reino di Dios, cu un wowo so, cu

teniendo dos wowo, bo wordo tira den candela di fierno, caminda nan bichi no ta muri, y e candela no ta paga. Proverbionan capitulo 1 ta para scirbi: Mi yiu si pecadornan tenta bo no consenti,mi yiu no anda cu nan. No laga bo pia cohe nan caminda, pasobra nan pia ta corre bay na maldad, y nan ta lihe pa drama sanger.

Pone un guarda na mi boca, O Señor , tene warda na e porta di mi lipnan. No inclina mi curason na ningun cos malo, practica obranan di maldad, hunto cu hende cu ta haci maldad y no laga mi come di nan delicatessenan.

Participa , apoya, of consenti cu maldad, ta biba den mesun caya, tira piedra sconde man , manda hende bay haci malo pa bo, of planea maldad, tur ta cosnan cu Dios ta rechasa completamente, pasobra Dios su wowo ta mira tur caminda.

Pasobra esun cu haci malo lo ricibi consecuencia di e maldad cu e a haci, y esey sin distincion di persona.( Colosensenan 3:25).

Asina anto: cada uno di nos , lo duna cuenta di su mes na Dios.( Romanonan 14:12).

Arrepentimento pa yega na salvacion di alma pa medio di Cristo Hesus, ta locual tur hende mester haci,

ta iocuai tur nende personalmente mester scohe pa haci, pasobra mientras cu nos ta na bida, nos tin e oportunidad pa drecha nos asuntonan cu Dios, pero despues cu nos muri nada, nada no por wordo ahusta mas.

Un hende por haci oracion pa un otro persona, pa e sali for di orguyo y maldad, pero ta e persona mes mester humiya su mes dilanti di Dios, y pidi pordon pa su picanan y asina kere den Cristo Hesus pa e por alcanza bida eterna.

Dios ta odia Orguyo. E temor di Señor ta pa odia maldad: Orguyo, Arogancia y mal caminda, y un boca perverso, mi ta odia.( Proverbionan 8:13). Ora cu Orguyo ta bini, deshonor tamabe ta bini,ma sabiduria ta serca e humildenan. ( Proverbionan 11:2)

Cada hende cu ta Oguyoso

su curason ta un abominacion pa Señor, siguramente e lo no keda sin castigo.( Proverbionan 16:5).

Orguyo ta bini prome cu destruccion, y un spirito arogante prome cu caida.( Proverbionan 16:18).

Dios no kier herida bo Orguyo,Dios kier mata bo Orguyo, pasobra Orguyo ta un influencia diabolico.

Ora hende ta halsa nan mes, nan ta chercha Dios,y haci bofon,ora hende no ta respeta Dios, no tin temor di Dios, conociendo e caminda,di berdad y moral, nan ta desvia completamente for di e palabra di Dios, y drenta un bida di inmoralidad y abominacion, esey nos ta yama culminacion di Orguyo.

Dios ta duna oportunidad na tur hende pa arepentí, pasobra Dios no kier pa ningun hende bay perdi , pero pa tur yega na conocimiento di Su Palabra.

### Gradicimento y Invitacion

Na number di esaki famia kier a gradici tur esnan cu na un manera of otro a duna nos sosten, consuelo y forsa durante e tempo dificil cu e fayecimento y entierro di nos defunto stima:



**Sra. Isidoria M. Rasmijn-Tromp**  
Cariñosamente yama "Chima"  
\*15-5-1954 - †29-01-2024

Un danki na un y tur cu a manda carchi, krans, whatsapp, via facebook y a haci yamada nan telefonico.

Un danki special na dokter Singh pa su atencion medico na cas.

Alabez nos kier a invita pa 3 Santo Sacrificio di misa na Santa Filomena na Paradera.

Cual ta tuma lugar: Diahuebs 8 februari 2024 pa 7'or p.m.  
Diabierna 9 februari 2024 pa 7'or p.m.  
Diamars 13 februari 2024 pa 7'or p.m,

Boso presencia ta altamente aprecia.



"Señor ta mi wardador, mi'n tin falta di nada  
Den cunucu di yerba berde e ta ponemi sosega.

E ta hibami na awa tranquil,  
Pa mi bolbe haña forsa".  
Salmo: 23


Nos ta anuncia fayecimento di:



## Emitterio Croes

\*22-04-1931 - †06-02-2024  
Acto di entierro lo wordo anuncia despues.

Cu gran dolor y tristeza den nos curason, mas alabez cu inmenso gratitud pa su bida y legacia, nos ta anuncia fayecimento di



## Sr. Harold D. Malmberg

Esposo di sra Maud Malmberg-Brown, Tata di Ricardo, Lisette y Giovanni, abuelo di Thalia, Ricardo Jr., Samantha, Thiago, Joey y Jamiro y bisabuelo di Jayden y Mia.

Rumanan Hans, Liesje, Milly, Hellen, Lillian y Clyde, tur sobrino, sobrina, famia, amistadnan y Junta Directiva, Gerencia y Staff di De Palm Corporation VBA y tur empresa subsidiario.

Un gran pionero y visionario di nos industria turistico, cu a contribui inmensamente na nos pais a bay sosega na paz.

Juan 14:1-2: 1“No preocupa of rindi na miedo, pasobra bo a kere den Dios, awo confia y kere den Ami tambe.

2 E Cas di mi Tata tin hopi morada, y ami ta bay pa prepara un lugar pa boso.”

Oportunidad pa condolencia, diahuebs 8 di februari 2024 di 6:00 pm pa 8:30 pm na Royal Funeral Home Acto di entierro y despedida lo tuma lugar na Royal Funeral Home, diabierna 9 di februari 2024 di 9:00 am pa 11:30 am, sigi pa e ceremonia di despedida 11:30 am pa 12:15 pm.

Acto di cremacion lo tuma lugar den seno di famia.

En bez di flor of krans, famia lo prefera un donacion den Harold Malmberg su nomber na Centro di Barrio Dakota.

Informacion di Cuenta Bancario:

- Number di beneficiario: Buurt- en Sportvereniging Dakota
- Banco: Banco di Caribe
- Number di Cuenta: 80880301

## ORACION DI DIA



**Un feliz dia yena di bendicion, gracia, amor y paz di Señor.**

”lo Mi haci loke bo a pidi. Lo Mi duna bo sabiduria y poder pa bo por husga entre bon y malo; di tal manera cu nunca ningun hende tabata por prome cu bo, ni ningun hende lo no por despues di bo”(1 Reynan 3, 12)

Rumannan, Señor nos Dios ta duna nos loke nos pidi, si ta Su boluntad.

P’esey ta hopi importante pa nos resa y pidi cu fe. Pidi sabiduria mescos cu Salomon. Salomon no a pidi rikesa pero pa e por distingui e bon for di e malo. Nos hopi biaha ta pidi pero nos mester siña pidi.

Nos mester confia cu Dios ta duna nos na e momento husto. Señor ta wak hopi mas leu, p’esey no ta tur ora nos ta haya loke nos kier, pero mas bien nos ta haya loke ta necesario.

Rumannan ban confia den e plan di Dios.

Algo ta pasa of un hende ta bay of nos no ta haya loke nos kier, paso Dios tin algo miho pa nos. Djis confia y yama Dios danki.

Oracion: Señor yena mi cu forsa y fe. Laga mi sinti Bo amor y presencia. Pa ora mi tin cu pidi y tuma decisionnan importante mi haci Bo boluntad.

Laga mi scucha Bo bos na e momentonan ey. Paso Abo sa kico ta e miho decision. Abo semper t’ey pa mi y kier e miho pa mi bida.

Amen.



## Obituario



Publica serka nos anuncio di fayecimento di bo ser keri. Nos tin 2 pakete pa ofrece;

Pakete 1: Anuncio di fayecimento te dia cu e defunto ser dera

Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto ser dera

Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

**Pa mas informashon por tuma contacto cu oficina na 585-9500 of na 741-4554**

# Habitantenan a sali yuda dama; Homber a bati'e y lastre cu auto

Savaneta: Diamars den careda di 8 or y 45 di anochi, presencia di polis a wordo pidi na un cas na Savaneta. Pa motibo cu habitantenan lo a "rescata" un dama cu a wordo maltrata y su pareha lo a trata na pasa auto riba dje.

Na yegada enberdad polis a bin topa cu un dama herida, na e sitio nan a bin compronde cu e dama a haya discussion cu su casa y esaki a maltrat'e seriamente y despues lo kier a pasa auto riba. E lo

a lastr'e.

E habitantenan cu a scucha e dama ta grita pa auxilio a sali pafo pa yuda e dama y e pareha agresor a bandona e sitio den su Hyundai Getz color di oro.

Mirando cu e dama a keda seriamente maltrata polis a pidi pa un ambulance. Tambe na e sitio a bin compronde cu e homber agresor ta un bon conocido di polis.

E dama mirando e golpi-



nan cu e la ricibi a wordo hiba Hospitaal pa mas atencion medico; unda cu

slachtofferhulp lo a presenta tambe na Hospitaal. No ta conoci si e dama lo

bay haci un denuncia oficial contra su casa agresor.

## Otro turista herida den accidente di utv



Bushiribana - Diamars den oranan di atardi un UTV/ATV a bolbe accidenta cu turista, ariba e caminda di tera entre Bushiribana cu Natural Bridge. Esaki tawata motibo pa polis y ambulance bay e sitio.

Na yegada a topa cu un grupo, y entrenan un dama turista cu pa un of otro motibo a perde controla y bay cay.

Paramediconan cu a yega e sitio a prepara e dama turista y a hib'e Hospitaal unda su compañe lo a bay top'e.

Asina por mira cu e accidentenan di machine nan aki ta keda sosode, un mas serio cu otro.

Tin di e personanan aki nunca di nan bida a subi un di e machine nan ey, y esaki cu tur e consecuncianan cu e tin cu ne den e tera panort ya.

**Clasificados**

SOLODIPUEBLO@GMAIL.COM  
CEL. 585 9500